



CONCLUSIÓNS

do equipo autor deste informe

Primeira.- O crecemento económico de Galicia en 2007 (4%) quedou dúas décimas por riba do estatal e foi 1,1 puntos maior que a suba media da Unión Europea. Por sectores produtivos, os servizos tiveron a evolución máis positiva e na industria sobresaíu a progresiva desaceleración ao longo do ano. (Capítulo I)

Segunda.- Ese crecemento económico galego xerou unha suba do emprego neto do 2,8% (en postos de traballo equivalentes a tempo completo); a maior xeración deuse nos servizos, e a maior diminución no sector agropesqueiro. (Capítulo I)

Terceira.- O saldo do comercio galego co estranxeiro só presentou superávit no segundo trimestre, mentres que o déficit comercial foi especialmente intenso no segundo semestre.

No saldo exterior total (co estranxeiro e coas outras comunidades autónomas) Galicia foi a segunda comunidade por saldo negativo absoluto e a terceira (cun 24,7%) na porcentaxe de déficit en relación co PIB da comunidade autónoma. (Capítulo I)

Cuarta.- A taxa de inflación rexistrada en Galicia en 2007 (4,1%) foi a maior do último quinquenio e quedou unha décima por baixo da media española, e ao redor dun punto por riba da suba media da UE.

Na desagregación por grupos de gasto en Galicia, o transporte, o aluguer da vivenda, os alimentos e as bebidas tiveron a maior suba. (Capítulo I)

Quinta.- De acordo cos datos do último Directorio Central de Empresas do INE (xaneiro de 2007), aumentou no último ano o número de empresas nas catro provincias galegas. Galicia ten a xaneiro de 2007 duascentas mil vinte empresas que representan un seis por cento do total estatal, porcentaxe idéntica á do ano anterior. (Capítulo II)

Sexta.- O gasto en I+D de Galicia supón segundo o último dato dispoñible o 0,90% do PIB, unha centésima por riba sobre o do ano anterior, pero afastado da media estatal (1,20%) e cunha diverxencia maior que a existente en variables como o PIB ou a renda. (Capítulo II)

Sétima.- A poboación de Galicia en 2007 subiu tan só un 0,17% e fíxoo grazas a achega da inmigración; a de España aumentou a una taxa 6 veces superior (1%), polo que continua, un ano máis, a perda do peso relativo demográfico galego no

total estatal. Desde o ano 2001, o crecemento da poboación galega foi dun 1,45%, e o da española, sete veces maior (un 10%).

A poboación estranxeira residente en Galicia en 2007 é un 3,4% da nosa poboación total (fronte ao 11,3% da media española). (Capítulo IV)

Oitava.- Galicia foi de novo en 2007 a penúltima comunidade autónoma por taxa de natalidade (tras Asturias) mentres que foi das de maior taxa de mortalidade (a segunda comunidade). O efecto combinado das dúas taxas fixo que o crecemento natural da poboación galega fose, un ano máis, negativo, e Galicia volveu ser a comunidade autónoma cun maior descenso poboacional en valor absoluto. (Capítulo IV)

Novena.- A poboación activa de Galicia subiu un 1,6% en 2007 (dúas décimas máis que no ano anterior). A taxa de actividade subiu en Galicia en 2007 seis décimas (unha máis que a media estatal); a feminina foi en 2007 do 46% e a dos homes dun 63%; o diferencial agrandouse en nove décimas respecto do ano anterior. (Capítulo IV)

Décima.- A taxa de emprego de Galicia foi en 2007 do 41,4% nas mulleres e dun 59,7% nos homes.

A taxa de desemprego en Galicia no ano 2007 (7,5%) quedou un punto por baixo da media estatal e foi moito maior nas mulleres (10%) que nos homes (5,7%). (Capítulo IV)

Undécima.- Os datos do paro rexistrado demostran que a comparación interanual de decembro de 2007 con respecto a decembro de 2006, reflicte unha redución do 3,54%. No conxunto de España produciuse unha suba do 5,27%.

A taxa de paro rexistrada alcanza o 11,90% en 2007, fronte ao 12,51% do 2006 e fronte ao 9,59% da media estatal, presentando un peor comportamento no caso das mulleres onde acadou o 16,49% fronte ao 8,20% do colectivo masculino, pero cunha tendencia á redución con respecto ao 2006 (17,40%), especialmente no grupo de mulleres menores de 25 anos. (Capítulo IV)

Duodécima.- Polas características do traballo das mulleres (mais traballo a tempo parcial, subrepresentación en postos altos, menor antigüidade media, maior temporalidade, etc.), as mulleres galegas percibiron un salario medio anual un 26,94% inferior ao do home (30,12% media estatal), e o 35,6% das mulleres galegas tiveron ingresos iguais ou inferiores ao salario mínimo interprofesional (37,44% media estatal).

O importe medio das prestacións por desemprego percibidas polas mulleres galegas foi o 82,94% das prestacións recibidas polos homes (89,46% media estatal). De igual forma as pensionistas galegas percibiron como media o 71,60% das pensións do grupo de homes (66,51% media estatal). (Capítulo V)

Décimo terceira.- Mantense unha maior representación dos homes na contratación (52,76%) fronte ás mulleres (47,24%) que vai unida a unha maior temporalidade feminina (32,4% fronte ao 30,06% dos homes) e a un maior uso de contratos a tempo parcial (65,18%).

Hai que destacar que seguen existindo modalidades contractuais eminentemente femininas como a de interinidade (73,53%), mentres que o de fomento de emprego tradicionalmente feminino pasa a repartirse de forma case igualitaria. O sector servizos e ocupacións como empregada administrativa e traballadoras de servizos de restauración, persoais e de comercio, manteñen a maioría feminina (Capítulo V)

Décimo cuarta.- Os permisos por maternidade/paternidade foron gozados polas nais no 98,37% dos casos, e só no 1,63% polos pais. Porcentaxes semellantes danse nas excedencias por coidado de fillo. Do total de persoas que realizan un traballo a tempo parcial por coidado de nenos e nenas e adultos enfermos, incapacitados/as ou maiores, o 98% son mulleres. (Capítulo V)

Décimo quinta.- No ano 2007, excepto no réxime especial do Mar, increméntanse as cifras de empresas en alta na Seguridade Social, reflectíndose globalmente unha cifra lixeiramente superior á do ano anterior. No Réxime xeral, o 86,60% das empresas teñen menos de dez traballadores/as.

O sector da construción é o que maior número de centros de traballo abre, supoñendo máis do 60% do total, e, con gran diferenza, o que reflicte máis traballadores/as ocupados. (Capítulo VI)

Décimo sexta.- Continúa en 2007 a forte incremento do número de afiliados/as á Seguridade Social en Galicia, superando incluso o de 2006. O incremento é moi importante nos Réximes xeral e de autónomos, diminuíndo moi lixeiramente ós/as cotizantes aos Réximes do mar e agrario. (Capítulo VI)

Décimo sétima.- Seguindo a tendencia dos anos precedentes o incremento maior das afiliacións á Seguridade Social no 2007 prodúcese no colectivo das mulleres, que pasan a representar en media anual do citado ano o 43,84% do total dos/as afiliados/as en Galicia. (Capítulo VI)

Décimo oitava.- O número de perceptores/as da prestación económica de desemprego aumenta moi lixeiramente en 2007 sobre o ano precedente, situándose en 79.300 en media anual, que supoñen o 6,91% do total estatal. (Capítulo XIII)

Décimo novena.- Por mor do incremento das afiliacións en 2007, a ratio entre persoas activas e pasivas no sistema da Seguridade Social incrementa os efectos positivos, pasando a representar 1,52 persoas cotizantes por pensionista (catro décimas máis que en 2006) moi lonxe de todos os xeitos do 2,31 do conxunto do Estado. (Capítulo XIII)

Vixésima.- Do total de contratos rexistrados, o 88,95% o foron baixo unha modalidade de duración temporal, e só o 11,05% o foron de forma indefinida. Prodúcese unha diminución das conversións de contratos temporais en indefinidos, pasando dos 55.984 do 2006 aos 49.166 do 2007. Non obstante, redúcese a porcentaxe de temporalidade do 34,9% do 2006 ao 31,4% en 2007.

A modalidade contractual máis utilizada segue a ser o contrato eventual por circunstancias da produción (41,91% dos contratos iniciais). En segundo lugar atópase o contrato de obra ou servizo determinado (36,69% dos contratos iniciais) cunha redución con respecto ao ano anterior de 1,40 puntos (Capítulo VII)

Vixésimo primeira.- A taxa de temporalidade no sector privado acadou o 32,8% no colectivo masculino e o 33,3% no feminino (cunha destacada redución sobre o ano 2006, e diminuíndose as diferenzas entre homes e mulleres). No sector público situouse nun 19,6% e 29,5% segundo sexan homes ou mulleres. A rotación dos asalariados galegos foi de 2,51 contratos eventuais por cada traballador e a rotación das asalariadas galegas acadou os 2,82 contratos. (Capítulo VII)

Vixésimo segunda.- O número de empresas de traballo temporal segue estabilizado, aínda despois do acusado descenso de 2005. O número de traballadores/as cedidos/as por empresas de traballo temporal en Galicia durante o ano 2007 ascende en total á cifra de 78.391, correspondendo o maior número aos pertencentes a empresas de ámbito estatal, que supoñen o 80% do total. No que se refire a contratos de posta a disposición subscritos polas empresas de traballo temporal, a cifra rexistrada (112.191) é a máis alta de todos os anos desde a súa creación. (Capítulo VII)

Vixésimo terceira.- Da formación de demanda dirixida á poboación ocupada en Galicia beneficiáronse 10.798 empresas, o 91% delas foron pequenas e medianas empresas, con cadros de persoal entre 1 e 49 traballadores/as.

Na devandita formación participaron 76.245 persoas, ocupadas nesas empresas, realizándose ata 2.451.647 horas de formación. Por categorías profesionais, o maior número de participantes formados son traballadores cualificados (45,3%), seguidos de traballadores non cualificados (23,4%), técnicos (18,1%), mandos intermedios (9,6%) e directivos (3,6%).

Dos 76.245 participantes, 43.590 (57,17%) son homes, e 32.649 son mulleres (42,83%). Aproximadamente un 67% dos participantes homes pertencen a grupos de idade comprendidos entre os 26 a 45 anos, e un 74% dos mesmos grupos de idade para as mulleres. Tales datos varían lixeiramente segundo a acción formativa. Das 592 accións formativas, 15 concentran preto do 55% do total dos participantes, sobresaíndo: prevención de riscos laborais, atención ao cliente e inglés. (Capítulo VIII)

Vixésimo cuarta.- A oferta de formación correspondente ao ano 2007 dá conta dos resultados en formación de persoas traballadoras ocupadas, dos contratos programa, de ámbito estatal, materializados en Galicia, que supuxo a formación de 55.856 persoas traballadoras e a realización de 3.783.503 horas de formación.

O 70% dos participantes está entre as categorías cualificados e non cualificados. Un 53% do total de participantes pertence ao sector de produción.

Con relación ao réxime de pertenza na Seguridade Social dos participantes, nesta formación, o réxime xeral é o maioritario, con 40.229 participantes (un 72% do total), seguido do réxime especial de traballadores autónomos con 11.159 participantes (preto dun 20% do mesmo total) e un terceiro grupo de participantes

procede do réxime especial agrario por conta propia, con 3.546 (un 6,34% do referido total).

Na distribución dos participantes por sectores de actividade destacan os do comercio, industria manufactureira, outros servizos, hostalería e metal.

Do total de 55.856 participantes, 31.807 son mulleres (56,95%) e 24.049 (43,05%) son homes. Aproximadamente un 68% dos participantes pertencen aos grupos de idade comprendidos entre os 26 a 45 anos, para ambos sexos. Tales datos varían lixeiramente segundo a acción formativa.

Das 130 accións formativas, 10 representan preto do 60% do total de participantes, sobresaíndo: Informática de usuario/ofimática, prevención de riscos laborais, idiomas e xestión de recursos humanos. (Capítulo VIII)

Vixésimo quinta. - O número de convenios colectivos que existen en Galicia a 31 de decembro de 2007, xa sexan vixentes ou prorrogados tacitamente, é de 732, dos cales 125 son de sector e 607 de empresa.

Asináronse por primeira vez neste ano 23 novos convenios, todos eles de empresa, continuando deste xeito a tendencia á fragmentación da negociación colectiva. (Capítulo IX)

Vixésimo sexta. - O incremento salarial pactado nos convenios colectivos asinados e revisados en 2007 foi do 5,01%. Esta media é superior en 0,91 puntos ao IPC galego de 2007, que foi do 4,1% e superior en 0,81 ao estatal do 2007, que foi do 4,2%.

○ 48,2% dos convenios asinados e o 56,4% dos revisados recollen cláusulas de revisión salarial.

○ 93,8% dos convenios asinados en 2007 recollen cláusulas sobre saúde laboral.

○ 54,9% dos convenios asinados recollen cláusulas sobre discriminación e/ou acoso.

Só 5 convenios mencionan a distribución irregular da xornada.

O número de convenios colectivos que recollen cláusulas de sometemento ao AGA foi de 56, o 28,7% do total dos asinados.

Existen cláusulas sobre fomento da contratación indefinida que afectan a 146.348 persoas traballadoras (54,6%), recollidas en 62 convenios (31,8%), sendo 20 deles de sector e 42 de empresa. Ademais, recóllense nos convenios asinados en 2007 outras cláusulas tendentes a garantir ou aumentar o nivel de emprego existente no inicio da vixencia do convenio. (Capítulo IX)

Vixésimo sétima. - Seguindo a tendencia crecente da sinistralidade, o total de accidentes na xornada de traballo experimentou en 2007 un incremento do 6,75%, manifestándose este incremento exclusivamente nos cualificados como leves. Tamén experimentouse un aumento nos accidentes de traballo “in itinere”, que supuxo un 15,58% máis en relación co ano anterior, aínda que, como nos acontecidos na xornada de traballo, apréciase un descenso nos cualificados como graves e mortais.

Por actividades económicas, a construción segue a ser a actividade que máis sinistralidade rexistra, cunha gran diferenza cos demais. (Capítulo X)

Vixésimo oitava.- As persoas traballadoras con contrato temporal vense afectadas en maior medida que as de contrato indefinido, con máis do 50% dos accidentes cando supoñen o 31,36% da poboación asalariada. (Capítulo X).

Vixésimo novena.- En accidentes mortais prodúcese un descenso do 3,85% e do 12,12% nos accidentes cualificados como graves. En relación coa poboación asalariada, a pesca, así como a construción, son as actividades con maior número de accidentes mortais en relación coa poboación ocupada nelas. (Capítulo X)

Trixésima.- No que se refire ao índice de incidencia, Galicia, no total de accidentes, está case un punto por riba do índice estatal, tendo seis comunidades maior índice de incidencia. No referido a accidentes mortais, Galicia ocupa o segundo lugar cun índice que está máis de tres puntos por riba do estatal. (Capítulo X)

Trixésimo primeira.- No relativo a folgas provinciais, se ben a cifra das realizadas maniféstase case igual á do ano anterior, tanto a dos traballadores participantes como a de xornadas non traballadas presentan un fortísimo incremento. O “incumprimento de acordos ou normas legais” é o motivo específico que figura máis frecuentemente nas folgas realizadas no ano 2007. (Capítulo XI)

Trixésimo segunda.- Analizados os resultados dos procesos electorais en Galicia durante o período comprendido entre o 1 de xaneiro de 2004 e o 31 de decembro de 2007, tendo en conta os/as representantes con mandato en vigor a 31 de decembro de 2007, a central sindical UGT-Galicia, co 31,34% do total, é a que obtivo maior número de representantes (6.173), seguida da CIG e do SN de CC.OO. de Galicia con 28,58% e 28,37% respectivamente (5.628 e 5.588 representantes), alcanzando un total de 2.306 o resto das centrais sindicais e grupos de traballadores, cun 11,71%.